



Nakon akcije „Sunce“ u Mostaru

Petorka predata Tužilaštvu HNK

Za još pet osoba bit će raspisane potjernice

Nakon što su u ponedjeljak u združenoj policijskoj akciji „Sunce“ pripadnici Državne agencije za istrage i zaštitu (SIPA), u saradnji s pripadnicima MUP-a Hercegovinačko-neretvanskog i Livanjskog kantona uhapsili Anesa Kurbegovića, inače optuženog u predmetu „Lutka“, te Šeherzadu Porić, Darka i Vjekoslava Slišku te Samira Serdarevića, oni su jučer predati u nadležnost Tužilaštva HNK.

Kako nam je rečeno iz Kantonalnog tužilaštva, uhapšene osobe će biti zadržane 24 sata, nakon čega će biti odlučeno hoće li za njih biti zatražena mjera pritvora.



Kamion koji je zaplijenjen

Također, rečeno nam je da se istraga u ovom slučaju intenzivno nastavlja te se radi na prikupljanju dokaza.

Ova petorka je uhapšena zbog postojanja osnova sumnje da su kao članovi zločinačke organizacije počinili više teških krađa, a policija ih je, kako je to plasirano, slobode lišila nakon što su iz skladišta na ulazu u Mostar, uz magistralni put M-17, ukrali cigarete koje su natovarili u kamion.

Također, saznajemo da će za još pet osoba s područja BiH, koje se dovode u vezu s ovom organizacijom, biti raspisane potjernice.

M. Sm.